

23951 *CORRECCIÓN de erros da Lei 33/1999, do 18 de outubro, sobre concesión de créditos extraordinarios por un importe total de 30.435.217.623 pesetas, para atender insuficiencias de crédito nos exercicios 1997 e 1998, polas subvencións que se efectúan para a cobertura das diferencias de cambio das divisas obtidas en préstamos concedidos ás sociedades concesionarias de autoestradas de peaxe. («BOE» 300, do 16-12-1999.)*

Advertido erro no texto da Lei 33/1999, do 18 de outubro, sobre concesión de créditos extraordinarios por un importe total de 30.435.217.623 pesetas, para atender insuficiencias de crédito nos exercicios 1997 e 1998, polas subvencións que se efectúan para a cobertura das diferencias de cambio das divisas obtidas en préstamos concedidos ás sociedades concesionarias de autoestradas de peaxe, publicado no «Boletín Oficial del Estado» suplemento número 12 en lingua galega, do 15 de novembro de 1999, procédese a efectuar a oportuna modificación:

Na páxina 605, segunda columna, artigo 1, última liña, onde di: «... no exercicio 1998», debe dicir: «... no exercicio 1997.»

24003 *LEI 47/1999, do 16 de decembro, pola que se modifica o artigo 5 da Lei 25/1971, do 19 de xuño, de protección ás familias numerosas. («BOE» 301, do 17-12-1999.)*

JUAN CARLOS I

REI DE ESPAÑA

Saiban tódolos que a viren e a entenderen que as Cortes Xerais aprobaron e eu sanciono a seguinte lei.

EXPOSICIÓN DE MOTIVOS

A Lei 25/1971, do 19 de xuño, de protección ás familias numerosas, resérvalle-las beneficios que nela se establecen ás persoas que dispoñen dun «título de familia numerosa». Unha das condicións para obter este título é a residencia no territorio español.

Aínda que os beneficios establecidos na dita lei se estenden ós cidadáns comunitarios residentes no noso país en aplicación do principio de non-discriminación por razón de nacionalidade, recollido en diferentes regulamentos comunitarios relativos á libre circulación de traballadores na Unión Europea, non ocorre así, emporiso, cos cidadáns comunitarios non residentes no noso país, aínda que traballen dentro das nosas fronteiras.

Tanto o Regulamento (CEE) 1612/68, relativo ós traballadores por conta allea, como o artigo 52 do Tratado CE, relativo ós autónomos, establecen que os traballadores comunitarios disfrutan das mesmas vantaxes sociais cós traballadores nacionais.

En idéntico sentido se pronunciou reiteradamente a xurisprudencia do Tribunal de Xustiza comunitario, ó dictaminar que a regra de igualdade de trato prohibe non só as discriminacións ostensibles baseadas na nacionalidade, senón tamén tódalas formas encubertas de discriminación que, por aplicación doutros criterios de distinción, conducen de feito ó mesmo resultado. É o caso do requisito de residencia que reúnen máis facilmente os traballadores nacionais cós dos demais estados membros.

Prodúcese, xa que logo, e de feito, unha incompatibilidade formal entre a normativa española de protec-

ción ás familias numerosas e os diferentes regulamentos comunitarios que establecen a igualdade de trato, en relación cos nacionais, no tocante ás vantaxes sociais que se lles conceden a eles e ós membros das súas familias, o que fai necesaria a adecuación da normativa española ás esixencias lexislativas e xurisprudenciais comunitarias, incluíndo as derivadas da ratificación do Acordo sobre o espazo económico europeo.

Artigo único.

O parágrafo primeiro do artigo 5 da Lei 25/1971, do 19 de xuño, de protección ás familias numerosas, queda redactado nos seguintes termos:

«O cabeza de familia deberá ser español ou nacional dun estado membro da Unión Europea ou dalgún dos restantes estados parte no Acordo sobre o espazo económico europeo e te-la residencia en territorio español, ou exercer unha actividade por conta propia ou por conta allea en España, aínda que resida noutro estado membro da Unión Europea ou nalgún dos restantes estados parte do Acordo sobre o espazo económico europeo.

Canto ós fillos, seralles de aplicación, en todo caso, o previsto na condición segunda do artigo 4.»

Disposición derradeira primeira.

O Goberno, no prazo máximo de seis meses desde a entrada en vigor desta lei, elaborará e aprobará un proxecto de lei de modificación da Lei 25/1971, do 19 de xuño, de protección ás familias numerosas, o cal abordará con profundidade unha reforma dela e no que se terán en conta, en todo caso, as conclusións que se desprenden do informe elaborado pola subcomisión creada no seo da Comisión de Política Social, co obxectivo de estudar a situación actual da familia en España e coñecer e propoñerlle actuacións ó Goberno, aprobadas polo Pleno do Congreso dos Deputados na súa sesión do 13 de novembro de 1997.

Disposición derradeira segunda.

Esta lei entrará en vigor o día seguinte ó da súa publicación no «Boletín Oficial del Estado».

Por tanto,

Mando a tódolos españois, particulares e autoridades, que cumbran e fagan cumprir esta lei.

Madrid, 16 de decembro de 1999.

JUAN CARLOS R.

O presidente do Goberno,
JOSÉ MARÍA AZNAR LÓPEZ

24060 *REAL DECRETO LEI 22/1999, do 17 de decembro, polo que se concede un crédito extraordinario por importe de 38.472.463.379 pesetas, para aplicar a orzamento as indemnizacións satisfeitas ós afectados pola síndrome tóxica e se complementa o Real decreto lei 18/1999, de concesión de créditos extraordinarios e suplementos de crédito para atender gastos de investimento do Ministerio de Fomento. («BOE» 302, do 18-12-1999.)*

O Real decreto lei 3/1999, do 26 de febreiro, sobre pagamento das indemnizacións derivadas da sentenza da Sala Segunda do Tribunal Supremo do 26 de setembro de 1997, ós afectados pola síndrome tóxica, esta-

blece o procedemento que se seguirá para efectuarlo pagamento das mencionadas indemnizacións.

Para estes efectos, o artigo 1 dispón que o pagamento será realizado pola Dirección Xeral do Tesouro e Política Financeira, mediante operacións de tesourería, procedendo, posteriormente, á súa aplicación a orzamento polo importe dos realizados no exercicio, agás os efectuados no mes de decembro, que se aplicarán ó orzamento do exercicio inmediato seguinte.

Os pagamentos realizados, por este concepto, no 30 de novembro de 1999, ascenden a 38.472.463.379 pesetas, dos que a aplicación a orzamento, que debe realizarse antes de que remate o exercicio, require a previa existencia de crédito e, en consecuencia, a aprobación do correspondente crédito extraordinario dado que non existen dotacións para esta finalidade nos vixentes orzamentos xerais do Estado.

Na súa virtude, facendo uso da autorización contida no artigo 86 da Constitución española, por proposta do vicepresidente segundo do Goberno e ministro de Economía e Facenda, de acordo co Consello de Estado e logo de deliberación do Consello de Ministros na súa reunión do día 17 de decembro de 1999,

DISPÓN O:

Artigo 1. *Concesión dun crédito extraordinario.*

Para proceder á aplicación a orzamento dos pagamentos realizados, ata o 30 de novembro de 1999, ós afectados pola síndrome tóxica, concédese un crédito extraordinario, por importe de 38.472.463.379 pesetas, ó orzamento en vigor da sección 31 «Gastos de diversos ministerios», servizo 08 «Dirección Xeral do Tesouro e Política Financeira», programa 633A «Imprevistos e funcións non clasificadas», capítulo 4 «Transferencias correntes», artigo 48 «A familias e institucións sen fins de lucro», concepto 480 «Indemnizacións ós afectados pola síndrome tóxica, segundo sentenza da Sala Segunda do Tribunal Supremo do 26 de setembro de 1997».

Artigo 2. *Financiamento do crédito extraordinario.*

O crédito extraordinario, que se concede no artigo anterior, financiarase con débeda pública, de conformidade co establecido no artigo 101 do texto refundido da Lei xeral orzamentaria, aprobado polo Real decreto legislativo 1091/1988, do 23 de setembro.

Disposición adicional única.

Para os efectos do disposto no artigo 2 do Real decreto lei 18/1999, do 5 de novembro, polo que se conceden créditos extraordinarios e suplementos de crédito por importe total de 27.156.252.100 pesetas, para atender obrigas derivadas de gastos de investimento do Ministerio de Fomento, e se adoptan medidas urxentes referentes á rebaixa de tarifas das autoestradas de peaxe, e sen que isto implique modificación da cantidade de 17.814.000.000 de pesetas en que se fixaba o importe do suplemento de crédito, entenderanse comprendidas as expropiacións e servizos afectados relativos á autovía Mataró-Granollers, accesos provisionais entre a A-7 e o Centro Integrado de Mercancías do Vallés, desdoblamento da B-143 e Plata Sur do cinto de Barcelona.

Disposición derradeira única. *Entrada en vigor.*

Este real decreto lei entrará en vigor o mesmo día da súa publicación no «Boletín Oficial del Estado».

Dado en Madrid o 17 de decembro de 1999.

JUAN CARLOS R.

24182 LEI 48/1999, do 20 de decembro, pola que se autoriza a participación de España na segunda reposición de recursos do Fondo para o Ambiente Mundial Reestructurado. («BOE» 304, do 21-12-1999.)

JUAN CARLOS I

REI DE ESPAÑA

Saiban tódolos que a viren e entenderen que as Cortes Xerais aprobaron e eu sanciono a seguinte lei:

EXPOSICIÓN DE MOTIVOS

O 14 de maio de 1991 os directores executivos do Banco Internacional de Reconstrucción e Desenvolvemento (BIRD) aprobaron a resolución 91-5, pola que se creou a fase experimental do Fondo para o Ambiente Mundial (FAM), incluídos o Fondo Fiduciario para o Ambiente Mundial e o Fondo Fiduciario para proxectos de defensa da capa de ozono.

Posteriormente, o 16 de marzo de 1994, os representantes de 73 Estados membros, entre os que se encontraba España, aprobaron o «Instrumento constitutivo do Fondo para o Ambiente Mundial Reestructurado».

O FAM Reestructurado naceu co obxectivo de constituir un dos principais mecanismos de financiamento de proxectos e actividades relativos ó ambiente mundial, asegurar unha administración transparente e democrática e promove-la participación de tódolos países do mundo no Fondo.

Os recursos do novo FAM empregaranse para financiar proxectos e actividades que teñan por obxecto reducir as emisións de gases que provocan o cambio climático, preservar a diversidade biolóxica, dete-la contaminación das augas e protexe-la capa de ozono. Tamén se poderán financiar proxectos destinados a mitigar a degradación de terras, fundamentalmente desertificación e deforestación, sempre que estean relacionadas coas catro esferas de actividades do Fondo.

A Lei 9/1997, do 24 de abril, autorizou a participación do Reino de España no FAM Reestructurado e a contribución á primeira reposición de recursos por valor de 12,36 millóns de dereitos especiais de xiro sobre un volume total de recursos de 2.022,52 millóns de dólares.

A segunda reposición de recursos do FAM Reestructurado (FAM-2) ten como obxecto dota-lo Fondo Fiduciario do FAM nunha contía de 2.750 millóns de dólares para o período do 1 de xullo de 1998 ó 30 de xuño de 2002. Desa cantidade, España comprometeuse a achegar 12,03 millóns de dereitos especiais de xiro.

A política xeral de mantemento da presenza de España neste tipo de institucións financeiras multilaterais, así como a crecente preocupación polos problemas ambientais con consecuencias mundiais e a necesidade de contribuír ó desenvolvemento sostible ambientalmente dos países en desenvolvemento, aconsellan a participación de España nesta segunda reposición de recursos do FAM Reestructurado. O obxecto desta lei é a autorización para a participación de España na segunda reposición do Fondo Fiduciario do FAM conforme o exposto anteriormente.

Esta lei dítase en virtude dos títulos competenciais que a Constitución atribúe ó Estado no seu artigo 149.1.3.^a e 13.^a, referidos ás relacións internacionais e ás bases e coordinación da economía.